

# 't Herenhoentien



## BESTE KIENDER

De vekaansie zit d'r weer op en et ni'je jaor is begonnen. Piepmoes, de gele gouwe, et roodbossien, de doeve, Klaos de kaeter, Miep, et vrundinnegien van Klaos en alle ere dieren uut et Herenhoentien weensken jim een hiel gelokkig 1995 toe! Mar ok Jan, Bart, Saskia en Sietske hopen dat jim een hiel goed jaor hebben zullen.

As jim jaorig binnen, geven jim dan ok altied een fesien? Dat dot Piepmoes wél in et ni'jste verhael, dat op de volgende bladziede begint. Zien beste vrunden kommen bi'j him op vesite en nemen hiele mooie kedogies veur him mit. Et fesien begint hiel gezellig, totdat...

Omreden we et now toch ien keer over jaordaegeen hebben, hebben we dit keer van de inlegvellen een mooie jaordagkelinder maekt. Elke jaordag die aj' ontholen willen, kuj' daarop opschrijven. Ze moe'n je daar bi'j je thuus mar even mit helpen.


Op elk vel zitten an de boverkaante twie dikke stippels. Aj' daar gatties in maeken, en dan vervolgens een draotien deur de gatties doen, kuj' de kelinder ophangen.

Behalven dat d'r op disse bladziede een klein spullegien staot, staon d'r ok nog een peer op de achterkaante van et Herenhoentien. Kiek mar es gauw en tot de volgende keer!

## Let goed op !

Welke veurwarpen bin hier twie keer ofbeeld ?

Kun jim ze vienen ?



## *PIEPMOES IS JAORIG.*

*(een veurleesverhael van Sietske Bloemhoff)*

Over et pattien in de bos stappen twie voegels. Et bin de gele gouwe en et roodbossien.

"Heb ie ok zoe'n nocht an et fesien?" vragt de gele gouwe an et roodbossien.

"Jawis," antwoordt et roodbossien, "ik kon haost niet waachten, zo graeg wo'k naor Piepmoes toe. Ik bin bliede, dat et now eindelijk zoveer is, hi'j het altied zokke gezellige jaordagsfesies!"

"Now, dat vien ik ok," zegt de gele gouwe. "Lao'we mar gauw de doeve anhaelen. As hi'j mar niet vergeten is et kedogien veur Piepmoes te kopen."

Dan bin de beide voegels bi'j de boom waor de doeve in woont en vliegen omhogens naor die zien nust. De doeve zit al te waachten mit een mooi inpakt pakkien onder de vleugel. De drie vrunden besluten vot-en-daolik veerder te gaon.

Intied het Piepmoes alles klaor staon veur et feest. De kaemer is prachtig versierd mit slingers en belonnen. Et moesien het alderhaande mooie spullegies klaor legd en een protte lekkere dingen op 'e taofel zet. Et feest kan beginnen. En ja heur, daor wodt al op 'e deure klopt. De jaorsvesite komt d'r an.

As eerste komt de molle binnen. De molle is de buurman van Piepmoes. Hi'j woont een aentien veerderop in een ondergronds kesteel. Even laeter kommen de knien en de haeze binnen. Zi'j wonen wat veerder vot, haost an de ere kaante van de bos. Mar ja, knienen en haezen kun ommeraek hadde lopen, dat daoromme bin zi'j d'r zo gauw. En daor hej' werempel de protter ok al. Meerstal is de protter an de laete kaante. Hi'j mient altied dat et nog wel kan, dat d'r tied zat is. Protters bin now ien keer nogal aorig eigenwies.

Dan wodt d'r weer anklopt. Et bin de drie voegelvrunden. "Och heden hitskes, of biwwe de laesten" sjilpen ze deur mekaander.

"Nee heur, maek jim mar niet zo drok," zegt Piepmoes. "Mien ni'je vrunden Diedel en Daweltien moe'n ok nog al kommen. Die he'k ok nuugd, zie. Dan kun zi'j jim mitien kennen leren en jim heur, vanzels. Ze bin hatstikke aorig, dat vienen jim vast ok!"

As de beide honnen Diedel en Daweltien d'r even laeter ok binnen en iederiene daor kennis mit maekt het, gaon alle dieren eerst mit mekeer veur Piepmoes zingen. De moes staot boven op zien stoel en glundert d'r over, zo mooi vint hi'j et. Nao et zingen gaot Piepmoes zien kedogies uutpakken. Wollen jim graeg weten, wat hi'j allemaole krigt? Now, luuster mar:

Van zien buurman de molle krigt hi'j een mooie scheppe. "Daor kuj' prachtige ondergrondse geheime gangen mit greven, Piepmoes. Misschien kuwwe we wel zoe'n gang van jow kesteel naor mienend toe greven. Dan hewwe ok gien last weer van alderhaande ongedierte awwe bi'j mekeer op vesite kommen."

De knien en de haeze hebben tegere een peer pollegies kattedkruud kocht. "Aj' die in je tuun plaanten, kommen de katten vast niet dichte meer in de buurt van je kesteel, Piepmoes," zeggen ze. "Zi'j vienen zokke plaanten zo allemachtig stinken, dat ze d'r mit een grote boge om henne lopen. Wij hebben ze ok bi'j oonze huzen, en et helpt ommeraek!"

De protter het een videobaantien mitneumen. "Daor is een mooie tekenfilm op te zien over Micky Mouse, Piepmoes," zegt de protter. "Micky is ók een moes en hi'j beleeft ók alderhaande malle aeenturen, krek as jow. Mar hi'j woont hielendal in Amerike, heur, en da's hiel veer vot!"

De gele gouwe, et roodbossien en de doeve hebben wat lekkers mitbrocht veur Piepmoes. Een hiel groot en lekker stok keze. Daor bin moezen now ien keer gek op. Piepmoes is d'r hatstikke bliede mit.

En Diedel en Daweltien? Die hebben een prachtige jaorskelinder veur Piepmoes. Krek zoe'n jaorskelinder as die now bi'j et Herenhoentien zit. Piepmoes en jim kun daor alle jaordaegen diej'm ontholen willen op opschrijven.



As Piepmoes alle kedogies uutpakt en goed bekeken het, gaon de feestvierders spullegies doen, zoas domino, sjoelen, memory en gao zo mar deur. Now en dan gaot Piepmoes mit wat lekkers rond. Wat is et toch een meraokels gezellige middag.

Dan inienend wodt d'r wéér anklopt. Wie kan dat now toch wezen? Iederiene is d'r ja al lange! Meer gaasten verwaacht Piepmoes niet. D'r wodt nóg es anklopt en d'r wodt now ok wat zegd: "Bi'j' daore, Piepmoes? Toe je, doe de deure mar los. Et is goed volk. Ik wil jow zo graeg even fielsesteren mit je jaordag."

Wie is dat toch... De ni'je vesite het wat een nuvere stemme, een betien kraekerig... Heur mar... "Ma'k binnenkommen, Piepmoes? Ik heb ok een mooi kedogien veur je. En ik wil toch zo graeg mit jim mit speulen. Laot me d'r toch in, ie kriegen d'r vast gien spiet van!"

Wat toch een mal geluud, et klinkt zuver wat mierkerig. Waor dot et toch an daenken... Now ja, misschien is de vesite wel een betien verkolen, et weer is ok wat koolderig de laeste tied. En toch...

"Now ja," besluit Piepmoes, "lao'k de deure mar los doen. Wat meer zielen, wat meer vreugd!" En hi'j ropt: "Ik kom d'r an, heur."

Dan springen inienend Diedel en Daweltien naost Piepmoes. "Waacht even Piepmoes," fluustert Diedel. "Daweltien daenkt dat hi'j wet wie as bi'j de stemme heurt. En hi'j kon wel es geliek hebben. Laot dit zaekien mar even an oons over. Luuster goed. Ik tel tot drieje en dan doe ie de deure eupen. Meer hoej' niet te doen en wees mar niet bange."

De honnen gaon elk an weerskaanten van de deure en stief tegen de mure an staon. "Now Piepmoes," zegt Daweltien, "let op! Daor gaot ie! Iene., twieje., drie!"

Piepmoes dot de deure eupen en daor staot Klaos de kaeter. De rogge in de bocht, klaor om te springen. Hi'j het zien kattede klauwen klaor en alle naegelties uut om Piepmoes te griepen. "Now he'k je," raost Klaos, "daor haj' niet op rekend, hen. Vien ie mi'j niet een mooi jaorskedogien? En weej' wel wat dit jaorskedogien doen gaot? Et gaot jow lekker opeten!"

Krek as de kaeter toespringen zal, springen Diedel en Daweltien links en rechts van de deure veur et locht. "Dat zuj' wel laoten, aekelike kaeter daj' binnen," grauwen ze. "Maek daj' votkommen, eers zullen we je helder wat veur je gat geven." En ze stoeven uut aende, achter Klaos an. Klaos is zo allemachies schrokken, dat de haoren him recht overaende staon. De kaeter vligt haost, zo hadde lopt hi'j om an de honnen te ontkommen. De honnen hebben d'r wel schik in, dat zuj' begriepen. Wat is d'r now mooier veur honnen as achter een katte an te zitten. Now en dan happen ze naor Klaos zien stat. En wel es raek ok zo te heuren, want die kaeter gaot me toch te keer, alderheiselikst.

As Klaos, krek op 'e tied, de boerkeri'je instoft, kletst Miep, et vrundinnegien van Klaos, de deure gauw achter him dichte, vlak veur de twie honnesnuten. Miep heurde Klaos al van verens anjammeren kommen, zie, en hadde vanzels wel deur dat de kaeter in groot geveer verkeerde.

As Diedel en Daweltien weer bi'j Piepmoes weeromme binnen, vertellen ze an de ere dieren hoe Klaos heur nog krek ontkommen is. Mar de honnen daenken, dat Klaos et de eerste tied wel laoten zal om Piepmoes te pakken. Mit mekaander drinken ze nog een lekker glassien brummelsap op de goeie ofloop en doen nog een peer spullegies, veurdat iederiene weer op zien eigen huus an gaot.







As Piepmoes aovens op bedde ligt, bedaenkt hi'j dat hi'j tóch een mooie jaordag had het. Mar dat íene kedogien had om him niet hoeft!

In et veurige Herenhoentien zat een hiele domme fout. D'r ston bi'j de verhaelties van de kiender achterop dat ze op de Boekhorstschoele zitten. Dat is hielemaole niet waor! Et weren kiender van de Buttingeschoele die de prachtige verhaelties schreven! Sietske schaemt heur diepe...

# Tel ie mit ?

Veur et vakkien mit de sni'jpoppies staot et ciefer 4 ! Mar klopt dat wel ?

Nee, hen ? Tel de sni'jpoppies mar es, dan weej' mitien welk ciefer d'r wel veur staon moet. En hoe zit et mit de steerns, de bessems en de schaetsen ?





WIE BIN D'R JAORIG IN:

jannewaori

feberwaori

meert

april





WIE BIN D'R JAORIG IN:

meie

juni

juli

augustus





WIE BIN D'R JAORIG IN:

september

oktober

november

december

